



## KATA PENGANTAR



**PERDANA MENTERI  
MALAYSIA**

Kemenangan bersejarah yang dicapai oleh rakyat pada 9 Mei 2018 telah memberi peluang kepada sebuah pentadbiran baharu untuk meneraju dan membawa Malaysia kembali kepada kedudukan yang dihormati oleh masyarakat antarabangsa. Satu ketika dahulu kita sebuah negara bergelar Harimau Asia dan gelaran itu meyakinkan kita untuk kita capai *blueprint* Wawasan 2020 yang kita lakar untuk negara kita menjadi Negara Maju menjelang tahun tersebut.

Malangnya, langkah kita beberapa tahun terakhir ini tergelincir dari landasan dan kita seolah-olah hilang halatuju dan perasaan ini amat menekan. Kerana itu, kejayaan pada 9 Mei lalu amatlah bermakna kerana ia seolah-olah memberi cahaya harapan setelah melalui zaman sukar yang kelam.

Bagaimanapun, harapan kepada hari muka yang lebih baik dan bermakna pasti tidak terhenti dengan kemenangan tersebut. Di dalam meneraju perubahan yang kita harap lebih bermakna untuk rakyat, yang paling utama perlu kita tangani ialah kedudukan ekonomi negara yang jelas telah mengalami kerosakan yang amat teruk.

Ia bukan satu situasi yang mahu diwarisi oleh mana-mana kerajaan sekalipun tetapi apabila kita bersetuju menerajui kepimpinan negara maka suka atau tidak, ianya menjadi tanggungjawab Kerajaan untuk memperkenalkan strategi dan dasar-dasar yang boleh membantu mencapai objektif ekonomi yang boleh membawa rakyat keluar dari tekanan-tekanan semasa.

Apa yang kita minta dari rakyat ialah sedikit kefahaman bahawa kerosakan yang berlaku amat teruk dan memerlukan juga sedikit kesabaran dalam tempoh usaha-usaha mencari penyelesaian dijalankan oleh Kerajaan.

Walaupun Malaysia hanya sebuah ekonomi kecil, ianya terbuka dan persekitaran ekonomi global yang semakin mencabar membuat Malaysia terdedah kepada risiko luar terutamanya akibat ketegangan perdagangan yang terus memuncak dan peralihan dasar monetari dalam kalangan negara maju. Namun begitu, Kerajaan yakin momentum pertumbuhan ekonomi domestik kekal kukuh meskipun pada kadar sederhana. Sektor swasta pula perlu terus memacu ekonomi domestik dan Kerajaan memberi komitmen akan terus menyokong dan memudah aktiviti ekonomi serta meningkatkan daya saing negara melalui dasar fiskal dan monetari yang mampan.

Kerajaan telah melaksanakan perubahan dasar secara berperingkat bagi mencorak hala tuju baharu dan sedang melalui beberapa siri peralihan untuk menyokong inisiatif pembaharuan fiskal bagi memperkukuh pengurusan kewangan awam. Inisiatif pembaharuan ini penting bagi memastikan kestabilan makroekonomi dalam melaksanakan agenda pembangunan negara. Tanggungjawab ini merupakan satu tugas yang mencabar dan Kerajaan perlu memperteguh disiplin fiskal selaras dengan keperluan untuk mengimbangi kapasiti pendapatan dan komitmen perbelanjaan serta mengurangkan kedudukan hutang dan liabiliti Kerajaan yang telah mencecah RM1 trilion.

Berdasarkan hala tuju baharu terhadap pembaharuan fiskal, peralihan serta-merta yang dilaksanakan dalam jangka masa pendek diharap dapat menghasilkan kesan positif dalam jangka masa sederhana. Kerajaan komited untuk terus memberi penekanan kepada tadbir urus yang baik dan cekap dalam pengurusan dasar fiskal bagi memperkukuh kewangan awam. Justeru, terdapat keperluan mendesak untuk menambah baik rangka kerja tadbir urus terutamanya dari segi perundangan bagi meningkatkan pengawasan pentadbiran fiskal dalam aspek meningkatkan kecekapan dan mengurangkan ketirisan. Rangka kerja dan piawaian ini akan terus ditanda aras mengikut taraf dan amalan terbaik antarabangsa.

Penerbitan buku Tinjauan Fiskal dan Anggaran Hasil Kerajaan Persekutuan buat julung kalinya ini sejajar dengan aspirasi untuk meningkatkan ketelusan dan akauntabiliti pengurusan kewangan Kerajaan. Dokumen baharu ini juga melengkapi Belanjawan pertama di bawah pentadbiran Pakatan Harapan dengan matlamat menyampaikan maklumat berkaitan pengurusan fiskal Kerajaan yang lebih komprehensif. Penerbitan ini diharap dapat meningkatkan kesedaran dan kefahaman mengenai isu-isu dan perkembangan berkaitan kewangan awam.

Dalam mencapai matlamat untuk memperkukuh kedudukan kewangan negara, Kerajaan sentiasa berhemat dan lebih teliti dalam membuat sebarang keputusan dasar demi menjaga kepentingan rakyat dan negara. Ini penting supaya penarafan negara kekal sekurang-kurangnya pada gred pelaburan 'A'. Sehubungan itu, diharapkan Malaysia akan terus menjadi sebuah negara mesra pelabur dan perniagaan terutamanya untuk menarik pelaburan bernilai tambah tinggi bagi menyokong pertumbuhan inklusif dan berkualiti. Untuk mencapai semua ini Kerajaan akan mengekalkan disiplin fiskal dan berusaha mengurangkan hutang negara demi kesejahteraan generasi kini dan akan datang.

Terima kasih.



DR MAHATHIR BIN MOHAMAD

2 November 2018